

Byaij Gvaq Gvangaeuq Ngeix Saehgonq



走过古关忆历史

□ Cungh Hihcwngh / 钟希增



Bineix ndwensam, gou riengz gyoengq lauxsae cungsam hagdangz ndaw cin bae Vujmingz Daibingz Cin camgya aen ciet swncienz vwnzva Bouxcuengh Hawfwen “Sam Nyied Sam”. Dauqma daengz dieggaiq Gunhlunz Cin seiz, boux lauxsae he dwen naeuz yaek hwnj aen gvan gaeuq Gunhlunzgvanh bae yawjyawj, dou daengx bang vunz couh daengh de hwnjbae lo.

Dou byaij hwnj gwnz ndoi, diuzroen youh lingq youh raez, song henz gizgiz caenh dwg faex dei nywj heu, dingjndoi sang lumj yaek daemx fwj daemx mbwn. Bae daengz aen geuqndoi sang ndeu, henz roen laeb miz gaiq sigbei ndeu, baihgwnz raiz naeuz “Roengaeuq Gunhlunz”.

Byaij daengz naj gvanlaeuz, ngiengxyaeuq yawj hwnjbae, daengx aen gvanlaeuz gaeuqgatgat, caengz baihgwnz yawj ok ndaej coih caep gvaq, dingqnaeuz aen gvangaueuq neix gaenq ndaej baenz cien bi nanz lo. Neix couhdwg gizdieg hoenxcienq okmingz ciuhgonq Gunhlunzgvanh.

Gaengawq lizsij swlhliu geiq-naeuz, Gunghyenz bi 1052, hix couhdwg Bwzsung Vangzyou seiq nienz, bouxdaeuz Vunzcuengh Nungz Cigauh mbouj fug deng yawjcuij, comz bing fanj Ciuhsung, ciemq youq Yunghcouh, gag fung guh “Yinzvei vuengzdae”. Riengzdwk youh ndij dah hoenx coh baihdoeng bae, hoenx daengz Gvangjcouh hoenx mbouj roengz cij doiq dauq Yunghcouh. Sungyinzcuengh vuengzdae rox le, couh roengzlingh guenbing dwk-hoenx Nungz Cigauh. Vangzyou haj nienz ndwencieng, ndaek hak ciuz-dingz Cinz Suj youq Guengjsae, daiq bing yaek bae Yunghcouh dwk-hoenx Nungz Cigauh, deng de dwkbaiah youq laj Gunhlunzgvanh. Doeklaeng Diz Cingh bouxak daiq bing daj cungh-yenz baij daeuj daengz Binhcouh (Binhyangz), nyinhcaen cazyawj dei-hseiq dieggvan, rox mbouj heih hoenx. Couh cang guh sou bing mbouj hoenx, doengxhaemh cix baij bing byaij daj Roekdangz Geuqbaedcej soemhlaep veq gvaq Gunhlunzgvanh caeg dwk Nungz Cigauh daih-bonjyingz. Nungz Cigauh dengcat deng dwk baih, deuz coh Daihleix baih Yinznanz bae lo.

Ciuhgonq goengdaeuz Boux-cuengh ciemq miz gizdieg ndei hensouj, cix bauj mbouj youq, deng dwk baih doiq bae baenz cien leix. Gou ngeix, danghnaeuz mwhgonq Nungz Cigauh baengh Gunhlunzgvanh

dingjhoenx ndaej hingz, gag laeb aen guekgya maenh’ak ndeu louzcienz roengzdaeuj, aen guekgya de rox baenzlawz yiengh ne?

Lizsij baenzlawz byaij couh baenzlawz byaij, mbouj ndaej bae gyajsiengi, cawqdingh raeuz aeu yungzhaeuj aen ranzvunz hungmbwk Cunghvaz Minzczu bae.

Saeh gvaq 800 geij bi le, youq neix youh miz ciengz ciengq ndeu hoenx ndaej mokmok mekmek, byawz saw byawz hingz, mbouj yungh cam mbwn cam dei, haeuj aen diegmoh bi 1943 hwnjguh couh rox lo.

Bakgvaengh diegmoh miz aen sigbaizfangj ndeu gyaqciq raixcaix. Cungggyang vengzngeg coij saw hung ndeu—“Luzginh Daihhaj Ginh Gunhlunzgvanh Hoenxcienq Vut-mingh Guenbing Diegmoh”, song diuz saeu baihdaw dwg fouq doiqliemz Gozminzdangj Ginhsw Veijyenzvei veijyenzcangj Ciengj Cunghcwngh raiz—“Bouxak Ninz Roengz Vih Guekgya Caenh Cung Minzczu Caenh Hauq, Lwgmaenh Cimh Hwnj Saenq Dingjhoenx Ndaej Hingz Hwngguk Ndaej Baenz”; baihsuix vengzngeg dwg daihhaj cangih goeng swlinggvanh caenfwngz daezswz—“Gvan Laux Geiq Goeng”; Baihgvaiz vengzngeg dwg Ciz Yungjicangh boux guh Cungguk Gozminzdangj daiyauj bae Mizsuhlijhau Ginhgen ciepcoux Yizbwnj douzyangz yizsi daezswz—“Hoenzdaeuz Maenh’ak”; song diuz saeu baihrog doiqliemz dwg daihhaj ginh ginhcangj Du Yimingz youq Minzgoz 30 nienz raiz—“Lwed-nding Mbinsinz Haenqrengz Ngeihcib Ngoenz Gung Roengz Gunhlunz Hwk Mbei Dek Vunzdig, Vazbiuj Sang-ngaux Vifung Cienfan Leix Deq Cawz Yizbwnj Nai Hoenz Ndei Yinghyungz”.

Seizneix gou gag ngeix daengz bouh denyingj《Maenh’ak Gunhlunzgvanh》, ndawde couhdwg ingj gij lizsij saehgienh bingdoi huk raeuz caeuq fangzraq Yizbwnj hoenxcienq youq Gunhlunzgvanh neix, gij cingzciet gig ndaej gujvuj sim vunz. Mbwn gvengq raixcaix, ndwn youq naj sigbaizfangj, yawj coh ndoindoi lueglueg, gwnz-mbwn fwjhau mbinfele, dou fwt roxnyinh benq diegguk lajdin neix dwg geijlai dijbauj ha!

Dou byaij haeuj aen Bozvuzgvanj Hoenxcienq Gunhlunzgvanh bae, baihdaw baij miz gij doxgaiq guenbing Cungguk camgya gunghoenx Gunhlunzgvanh yungh gvaq, miz gij doenghyiengh giuj fangzraq Yizbwnj

ndaej dem, hoij miz gij mbaw doz gvendaengz hoenxcienq Gunhlunzgvanh, lij guh miz gij siengqcouq aen cingzgingj gyoengq gaugaep cienglingj cingq doxyaeng baijbouh hoenxcienq. Dou geij boux gwq yawj gwq byaij, mbouj rox mbouj nyinh byaij haeuj hoeg ndaw bae. Hoeg baihdaw cienzbouh dwg gij gingjnda ciuq gij cingzgingj mbat hoenxcienq buenq aen lai sigij gaxgonq hoenx ndaej mokmok mekmek, miz haujlai siengqcouq boux guenbing Cungguk dawz cungq haenq hoenx fangzraq Yizbwnj. Gou byaij gvaqbae gyawj di yaek nyinhcaen cimyawj gij cingzgingj hoenxcienq, sawqmwh daeng ndaep lo, ndaw ranz laepngaungau yawj mbouj raen saek yiengh. “Baeh lo, dingz dien lo.” Ndaw hoz gou gag swenj naeuz. Cingq youq seizneix, miz sing feihgih yiengjhuhu gvaq gwnz-gyaeuq daeuj. “Hum!” Sing saenq ndaej rwz yaek nuk, henz ndang fwt rongh dangq byajmig yapsad, roxnyinh miz maz doxgaiq sinzsusu. Ciepdkw seiqlengq cungqbauq yiengjhumhum, baez raq baez raq ronghfeiz lumj byajmig nei riengz sing bauq ronghyabyab, sing vunzlai hemq cung hemq gaj saenq ndaej mbwn yaek lak. “W——!” Sok rongh coeg da ndeu daj gwnzmbwn veh roengz lajdeih. “Hum” sing ndeu, gizgyae baihnaj fwt miz nyauej feiz ndeu dawzyabyab, rongh daengx goengq ndoi…… Daeng dauq rongh lo, ndaw canjdingh baijyienh lumj gaeuq. O, haxbaenh dwg bozvuzgvanj gunghcoz yinzyenz leihyungh yienhdaih gisuz daiq dou bae daengz buenq aen sigij lai gaxgonq bingdoi Cungguk caeuq bingdoi Yizbwnj ciengz hoenxcienq youq Gunhlunzgvanh, hawj dou ndaej gamjsouh doenghgonq bouxbing hoenxcienq dwgrengz lailai.

Bi 1939 bingdoi Yizbwnj gaenq ciemq bae le buenq aen Cungguk. Vihliux ciemq dieg moq, Yibwnj baij 3 fanh bing daj Ginhcouhvanh hwnj-hamq, gig vaiq couh hoenx ciemq ndaej Lungzcouh、Cinnanzgvanh、Namzningz、Gunhlunzgvanh, camx gat diuz gozci gyaudoengsienq baihnanz baihsaenamz huk raeuz, hengzguh daih bauhmx daih funksuj canloz, yaek sawj Cungzging aen beizduh Gozminzdangj cwngfuj Cungguk neix gudog fouz ingbaengh. Bingdoi Yizbwnj ciemq Gunhlunzgvanh aen gvan gaeuqgeq bakcong gozci gyaudoeng baihsaenamz huk raeuz le, Cungguk Gozminzdangj gaenjgip daj Huznanz、Gvangjdungh、Gveicouh

diuh bing daeuj Guengjsae, yaek daj ndaw fwngz Yizbwnj ciengj dauq Gunhlunzgvanh caeuq Namzningz, dauq swnjdoeng diuz gozciz dunghdau baihsaenamz huk raeuz.

12 nyied 18 hauh, ranz caengz rongh bingdoi Cungguk couh haindu gunghoenx gij bing Yizbwnj capsouj youq Gunhlunzgvanh, Yizbwnj okdoengh baenzgyoengq feihgih daeuj luenh caq, siengj laengz bingdoi Cungguk gunghoenx, hoeng bing Cungguk mbouj lau saekdi, haenqrengz buek hoenx, dwk dai haujlai bing Yizbwnj. Song mbiengj bingdoi youq Gunhlunz nem henz-gyawj geij aen nengzndoi sang hoenx ndaej mokmok mekmek, lumj rag gawq gawq faex, saet bae youh ciengj dauq geijlai baez, baihbaih cung dai sieng haujlai. Gunghoenx Gunhlunzgvanh dwg ciengz ciengq saedlig doiq saedlig ndeu, gyoengq guenbing Cungguk baengh gij saenqsim yaek ceng diegguk dauqma、gaej hawj Cungguk coujnaj, mbouj goq laelwed mbouj goq baegnaiq, hwnzngoenz buek hoenx, boux dem boux laemx roengzbae……

Byaij ok bozvuzgvanj, gou nyaenx mbouj ndaej youh ngeuxgyaeuq cimyawj, ndawsim diuqbubdub nanz-nanz caem mbouj roengzdaeuj, dangh-naeuz mbouj miz ciencien fanhfanh boux minzczu yinghyungz lumj gij guenbing youq Gunhlunzgvanh dingjhoenx Yizbwnz yienghde vih henhoh guekgya mbouj lau vutmingh bae hoenxcienq, aen huk raeuz couh mbouj miz ngoenzneix, aiq caeux couh deng mieddai lo.

Gou nem geij boux lauxsae cung sim naekgywggwyg, mwngz coenz gou coenz, mwngz hot gou hot eu hwnj-daeuj:

Ndwensam rumznanz raeuj
Rog gvangaueuq va hai
Dujduj cix raen gvai
Nai hoenzlaux bouxak

Gwnz ndoi va hoengzaeuj
Raeuz daeuj ngonz daeuj cim
Caez geiqniemh ndaej hingz
Ndawsim naekgywggwyg

Boux yinghyungz banlaux
Vih bauj huk hoh ranz
Hoenx Yizbwnj bingmanz
Youq gvangaueuq vutmingh

Bouxak mingh hwnj roen
Danhnyienh hoenz lij youq
Nem beixnuengx doxcaeuq
Hensouj ngoenzndei raeuz